

WARGEYNSKA

Waa wargeys soo baxa saddex
biloodba mar, kana faalloodaa arrimaha
jaaliyadda Soomaalida Netherlands

FSAN

CADADKII 20AAD | DAABACAADII 20AAD | 1DA LUULLYO 2021



“
Abaalmarintan waxaan ku muteystay halgankii
dheeraa ee aan u soo galnay la dagaalanka
gudniinka gabdhaha

TUSMADA WARGEYSA

Zahra Siyaad Naaleye Oo La Gudoonsiiyey Abaalmarinta Boqortooyadda.....	3
KOR UQAADIDA AQOONTA WACYIGALIYAASHA.....	4
Puntland Oo Soo Saartay Sharci Mamnuucaya Gudniinka Gabdhaha	4
Wareysi: Waxqabadka Ururka SSGE	5
MUSTAQBALKA CARRUURTA IYO KAALINTA WAALIDIINTA SOOMAALIDA NETHERLANDS.....	6
.....	7
XUSKA 1DA LUULYO EE SANADKAN 2021.....	7
Jaaliyadda Soomaalida Netherlands oo deeq lacageed ku biirisay barnaamijka badbaadi naf ee Muqdishu	8

Zahra Siyaad Naaleye Oo La Gudoonsiiyey Abaalmarinta Boqortooyadda

Zahra, madaxa arrimaha horumarinta bulshada iyo la dagaalanka caadooyinka xun ee dallada FSAN ayaa 26-kii April 2021 la gudoonsiiyey abaalmarinta ay bixiso boqortooyada dalkan Netherlands oo ah oranje-Nassau oo ah nooca officier, taasoo ay ku muteysatay doorkeeda la dagaalanka gudniinka gabdhaha iyo kaalinta ay ka qaadatay la shaqeynta wanaagsan ee jaaliyaddaha kala duwan ee dalkaan ku nool iyo hayádha arrimahaas ka hawlgala.

Zahra waxay kaloo tahay tababare wacyigaliyaasha (sleutelpersonen) iyo xirfadlayaasha hayádha kala duwan.

Abaalmarinta waxaa la bixiyaa sanad walba gaar ahaan waqtiga ku beegan dhalashada boqorka dalkan, waxaana la gudoonsiiyaa hadba shaqsigii loo arko inuu kaalin muhiim ah kaga jiro arrimaha horumarinta bulshada.

Zahra waxay sheegtay in iyadoo aysan fileyn loogu yeeray gemeentiga Alphen aan den Rijn taasow maayarka/duqa magaalada marwo Liesbeth Spies gudoonsiiyey abaalmarintan.

"Qolooyin aan isla shaqeyno oo ay ka mid yihii Pharos, GGD, velighthuis Amsterdam iyo dad badan oo kale sida Agaasimihii hore ee Pharos marwo Monica Berkum iyo wasiirkuxigeen hore ee wisaa radda caafimaadka maro Jet Bussamerker ayaa soo jeediye qorayna warqad in aniga aan mudanahay in la igu sharfo biladan, iyadoo la qiimeenayo halgankan ka hortaaga gudniinka gabdhaha oo aan muddo dheer soo waday." ayey tiri Zahra.



DAAWO WAREYSIGA ZAHRA

ZAHRA / ABAALMARINTA BOQORTOYADA / ORANJE-NASSAU



KOR UQAADIDA AQOONTA WACYIGALIYAASHA



Dallada FSAN ayaa 10-kii bishii April waxay qabatay tababar aqoontooda lagu kobcinayo qaar ka mid ah wacyigeliyaasha gudniinka gabdhaha oo ka socday waddamo kala duwan .

Tababarkan ayaa lagu qabtay qadka fogaan-araga ee Zoom-ka, kaasoo ay ka qeyb galeen ilaa 70 wacyigeliyaasha. Aqoon-isweydaarsigan ayaa waxaa looga doodayey qaliinka soo kabashada ee lagu sameeyo gabdhaha gudan.

Intii uu kulankan socday waxaa halkaasi casharo ka bixiyey Dr. Annemarie Middelburg oo ah sharci-yaqaanad dhinaca xaquuqda aadanaha iyo Dr. Refaat Karim oo ku takhasusay qaliinkaan.

Labada aqoonyahan ayaa waaya-aragnimadooda la wadaagay ka qeyb galayaasha tababarka, iyadoo wacyigeliyaasha ay iyaguna halkaasi ka dhiibteyn doodahooda iyo suaalhooda.

Puntland Oo Soo Saartay Sharci Mamnuucaya Gudniinka Gabdhaha

Golaha wasiirada dowlad goboleedka Puntland ee Somalia ayaa dhowaan meel mariyey sharci lagu mamnuucayo gudniinka gabdhaha. Sharcigan wuxuu mamnuucaya nooc walba oo gudniinka gabdhaha ayadoo ciddii ku xadgudubtana ay ciqaab mutaysan doonto.

Cawil Sheekh Xaamid, Wasiirka Cadaalada Puntalnd oo la hadlay warbaahinta Soomaalida ayaa sheegay in sababta keentay sharcigan ay tahay in aysan sii dulqaadan karin dhibaatada uu gudniinka ku hayo gabdhaha.

"Ma ahan wax kaste oo lagu soo dhaqmay oo caada dhaqameyd ah in aan la joojin karin, waad ogtihin in gudniinka uu dumarka ku keenay dhibaato badan. ayuu yiri wasiir Cawil Sheekh".

Wasiirka waxa uu sheegay in la mamnuucay nooc kasta oo gudniinka ah, isagoo axaadiista ay culimada qaar u daliishato gudniinka gabdhaha ku tilmaamay kuwo daciifa oo aan axkaamta loo xujeysan karin.

Xeer midkan la mid ah oo 2011-kii lagu joojiyay gudniinka ayay baarlamaanka Puntaland isku khilaafeyn, haddase waxaa lafilaya in hindisa shaciyeedkan baarlamaanka Punland uu ansixiyo.





Wareysi: Waxqabadka Ururka SSGE



MOHAMMED SAID | GUDOOMIYAHU URURKA URURKA SSGE

Gudoomiyaha ururka Soomaalida ee magaalada Eindhoven (Stichting Somalische Gemeenschap Eindhoven - SSGE-) Mohamed Said ayaa 25-kii bishii June 2021 ka warbixiyey waxqabadka ururkooda iyo heerarkii uu soo maray.

Mohamed Said waxa uu ku sheegay wareysi uu siiyey qeybta warbaahinta ee dallada FSAN in ururkooda SSGE la aasaasay sanadkii 1999-kii. Ujeedada loo aasaasayna ay aheyd waqtigaasi in wax laga qabto baahida jaaliyadda Soomaalida ee gobolka Brabant ee dalkan Netherlands.

"Waxaan markii hore ku bilownay inaan sameyno naadi kubbada cagta ee ay leeyihii jaaliyadeena iyo meelo ay isugu yimaadaan oo bulshadeena ay ku kulmaan ayna uga wada hadlaan dhibaatooyinkooda."ayuu yiri Mohamed Said.

Waxa uu intaa ku daray in runtii ay ku guuleysteen in ay dhisaan ururkaan uuna wax badan ka qabtay baahiyahii jiray, sida goob carruurta lagu baro dhaqankooda

iyo diintooda, isla markaana looga caawiyo casharada iskuulada.

Mohamed waxa kale oo uu sheegay in kooxdii kubbadda cagta ee ay sameeyaan ay ka qeyb galeen tartamo badan oo dalkan ka dhacay iyo safari ay u galeen wadamo ka mida Yurub iyo Canada oo ay kaga qeyb galeen tartamo ciyarta kubadda cagta ah. Waxa uu sheegay in SSGE ay wax ka qabatay arrimaha ku saabsan qaxootiga, sharciyada, shaqo u raadinta dhalinyarada Soomaalida iyo isdhexgalka arrimaha bulshada.

MUSTAQBALKA CARRUURTA IYO KAALINTA WAALIDIINTA SOOMAALIDA NETHERLANDS.

W/D: Abdishakur Elmi

Kulan aqoon iswedydaarsi ah oo uu qabanaabiyeen ururka Somali4all oo ka mida dallada FSAN laguna qabtay magaalada Baarn ee gobolka Utrecht ee dalka Netherlands ayaa looga hadlay xal u helida dhibaatooyin u gaar ah jaaliyadda Soomaalida. Kulankan waxaa ka qeybgalay Jaaliyadaha Soomaalida ee ku dhaqan magaalooyinka Baarn, Amersfoort & Zwolle. Qoddobada diirada lagu saaray waxaa ka mid ahaa;



- Waxbarashada carruurta Soomaalida heerarkeeda kala duwan,
- Barbaarinta carruurta 2da dhaqan
- Kaalinta waalidka ay ka qaadan karaan horumarka iyo dib u dhaca ubadkooda.

Madasha waxaa sidoo kale looga dooday sababta ay carruurta Soomaalidu qaar ka mid ah ay uga liitaan waxbarashada? iyo sababta aysan uga qeyb qaadan siyaasadda dalkan?

Su'aalahay iyo kuwa kale ayaa la dhixdii kulankaasi ka soo qeybgalay oo u badnaa dhalinyaro, waxaanna sidoo kale doodaasi kaalin muhiim ah ka qaatawaa waalidiin isugu jiray aabeyaal iyo hooyooyin dhinacooda ka hadlay sida xal loogu heli karo caqabada haysta bulshada Soomaalida.

Dhalinyaradii kulanka ka qeybgalay intooda badan waxay isku raaceyn in deegaanka ay saameyn ba'an ku yeelaneysa noloshooda, sidoo kalena waxay khirayn in go'aamada masiiriga ah sida jidka waxbarasho ee ay dooranayaan intooda badan ay waalidka kala tashadaan, mararka khaarna ay dhici karto in isku dhac ka yimaado rabitaankooda la xiriira maadada ay dooranayaan iyo sida waalidku doonayo.

Shamso Cabdullaahi, oo ka mid aheyd dadkii kulankaasi ka hadlay waxay sheegtay in guusha iyo guul-darradu carruurta xilliyada ay waxbarashada ku jiraan ay tahay wax qaadirku qoray, ayna jiraan carruur waalidkoodu ku dadaalayn, haddana gaari waayey hadafkii waalidku la rabay iyo kuwo waalidkoodu ay gabeyn kaalintii barbaarinta carruurta, haddana carruurtii ay noqdeen kuwa waxbarashada ku aflaxa.

Cabbaas Cali Nuur, oo doodda qeyb ka ahaa ayaa dhinaciisa wuxuu sheegay sida ay lagama maarmaan u tahay in qofku isu kalsoonaado xitaa haddii la isku dayo in ay qalbi jebiyaan dad ujeeddooyin gurracan leh.

"Dhowr habeen ayaa anigoo ooynaya gurigeyga imid, sababtu wax kale ma ahayne nin aan wada shaqeeyn jirnay oo markii dambe xanuun dhanka maskaxda ah uu ku dhacay ayaa igu yiri "meeshan kama shaqeeyn kartid" waxaan ku guuleystay in ninkaas aan hadalkiisa beeniyo oo aan tuso inaan ka shaqeeyn karo, weliba aan madax ka noqon karo, guushaasi kuma iman inaan iska jiifsaday habeenno badan ayaan waxbarashada ku gaari jiray ilaa 2-da habeenimo, qofku marka ay ka go'an tahay inuu gaaro yoolka uu tiigsanayo ma jirto



cid hor istaagi karta, dalkan waxaa suurtagal ah inaad la kulanto dad ku qalbi jebinaya haddiise aad tahay qof ay ka go'an tahay inuu isbeddel sameeyo runtii halkan fursado badan ayaa jira, weliba xilligeenii annaga aan dalkan soo galnay ma jirin fursadahaasi" Ayuu yiri Cabbaas Cali Nuur, isaga oo biya-dhaca doodiisa ku sheegay sida ay muhiim u tahay in qof kasta gaar ahaan dhalinyarada aysan aaminaan in wax kasta oo ay ku hamiyaan in ay gaari karaan, waxa keliya ee ka xigana in ay tahay dedaal".

Mohamed Abdi (Abuna) oo ka shaqeeya dowlada hoose ee magaalada Amsterdam, ayaa ka mid ahaa dadkii kulankaasi ka hadlay, wuxuu hoosta ka xariiqay in dalkan Netherlands ay ka jirto cunsurinimo, haddana ay ku xiran tahay sida qof kasta ee la cunsuriyeyo uu kaga fal-celeyo.

"Anigu waxaan ka tirsanahay shaqaalaha gemeentiga Amsterdam waxaan ahay "ambtenaar" meeshii aan ka shaqeynayay nin madax ka ahaa ayaa igu yiri shaqadan kama bixi kartid, waxaan tusay inaan ahay qof karti & aqoon kulansaday, shaqadiisana ku filan, haddii se aan hadalkiisa qaadqaadi lahaa isagaa guuleysan lahaa, waxaan tusay inaan ahay qof shaqadiisa ka soo bixi kara" Ayuu yiri Abuna.

Ahmed Hayaan, guddoomiyaha Jaaliyada Soomaalida Zwolle iyo nawaaxigeeda oo ka mid ahaa waalidiintii iyo aqoonyahanadii aragtigooda ka dhiibtay muwduucyadii laga hadlay, ayaa ka dalbaday dhalinyarada in xittaa haddii waxbarashada ay ka saaqidaan in aysan cayr dalban, oo ay shaqeystaan.

XUSKA 1DA LUULYO EE SANADKAN 2021



Magaalooyin badan ee dalka Nederland waxaa lagu xusay 61-sanno guuradii ka soo wareegatay madaxbanaanadii Soomaaliya ee 1da Luulyo sanadkii 1960-kii iyo midowgii koonfur iyo waqooyi ee dalkeena Soomaaliya.

Gaarahaan magaalada Den Haag ayaa ka mida ahayd meelaha sida weyn looga dabaaldagay, iyadoo halkaasi ay meel fagaare ah isugu soo yimaadeen Soomaalida ka kala timid qaar ka mida gobolada iyo deegaanada ku dhow dhow gobolka Zuid Holland.

Xaflada maalintan loogu dabaaldagayey waxaa soo qaban qaabiyyey dallada FSAN oo iyadu sanad walba kaalin muuqata ka qaadata xuska 1da Luulyo si carruurta ku dhalatay dalkan iyo kuwa ku soo barbaaray loo baro qiiamaha maalintan. Dhalinyaro isugu jira hablo iyo wiilal oo ku labisan midabka calanka Soomaaliya ayaa halkaasi ku muujiyey farxada maalintan 1-da Luulyo.

Dhalinyaradu waxay ku heesayeen heesaha wadaniga ee maalinta u gaarka ah. Waxaa kaloo iyana maalmo ka hor 1-da Luulyo loo dabaaldagay 26-kii June oo aheyd markii gobolada waqooyi ee Soomaaliya ay ka xoroobeen gumeystahii Ingiriiska.

Halganka gobonima-doonka Soomaaliya waxaa u daatay dhiig badan waxaana u naf waayey geesiyaal badan oo suurtagliyey in Soomaaliya ay ka hoos baxdo gumeystahii ku soo duulay dhulkeeda.



Jaaliyadda Soomaalida Netherlands oo deeq lacageed ku biirisay barnaamijka badbaadi naf ee Muqdishu

**Donation of \$5000 From
Somali Community IN
Nederland
TO Save a Life (Badbaadi Naf)**

COVID-19
Coronavirus

Jaaliyadda Soomaalida Netherlands ayaa ka qeyb qaatay barnaamijka Badbaadi Naf ee lagula tacaalayo xanuunka coronavirus ee dalka Somalia.

Jaaliyadda waxay iska soo aruursheen deeq lacageed iyagoo gaarsiiyey guddiga u xil-saaran barnaamijkaasi Badbaadi-Naf.

Guddiga badbaadi naf ayaa ka mahadceliyey deeqda-lacageed ee ay iska aruursheen jaaliyadda Soomaalida ee Netherlands.

Gudoomiyaha dallada FSAN Ali Ware ayaa ka warbixiyey doorka ay ka qaateen barnaamijka badbaadi-naf ee Muqdishu ka socda, isagoo sheegay in qaar ka mida jaaliyadda Soomaalida ay is xilqaameen oo ay lacago iska soo aruursheen.

Ali waxa uu sheegay in mar walba ay diyaar u yihiin inay ka qeyb qaataan barnaamijyada loogu gurmaya dalkii hooyo, isagoo intaa ku daray in horey uga soo qeyb qaateen gurmadyadii loo fidiyey dadkii ay waxyeeladu ka soo gaartay fadaadahii iyo abarahii dalka ku dhuftay.